

1413, Februar 5.

256.

*Tauschvertrag des Stiftes S. Nicolai in Magdeburg mit dem Kloster Berge, wonach dasselbe dem Kloster zwei Höfe und einige Zinsen mit Lehnfreiheit in Olvenstedt übereignet, dagegen von diesem einen Hof daselbst, auf welchem die Windmühle steht, nebst einigen Zinsen empfängt.*

We Hinrik deken unde dat capitel der kerken to sunte Nycolawese up dem nyenmarkede to Meydeborch bekennen openbar in desseme ieghenwerdighen breve vor uns unde unse nakomelinghen dat we myt ghudem willen unde wolbedachtem mode hebben vorletten unde vorletten myt orkunde desses breves to ewygher tyden deme erwardighen vader in gode hern Hinric abbete der hilghen kerken to sunte Iohannis baptisten to Berghe vor Meydeborch unde synen nakomelinghen in der ebbedye der sulven kerken twene höve in dem dorpe to Olvenstede der en Hans Bertekes de andere Hans Pentzikens hord unde beyde an enander lyghen myd lenware vryheyd mit alleme rechte unde ok myt achteyn Meydeborghescher penninghe ewyghes tynses to ghevende alle iar, enen schilling ut deme hove Hans Bertekes, ses penninghe ut Hans Pentzikens hove up sunte Walburghe dag, also we de sulven hove lenware vryheyd unde rechticheyt dar ane had hebben unde de tynse dar van alle iar up de vorscrevene tyd ghenomen hebben, dor desse sulven twene hove lenware vryheyd rechtigheyd unde tynse heft de sulve her Hinrik abbet erbenomd vor sek unde syne nakomelinghen in der ebbedye des vorscrevene goddeshuses to Berghe uns unde unsen nakomelinghen der vorscrevene kerken to sunte Nycolawese wedder ghelaten unde let to ewyghen tyden myd orkunde synes beseghelden breves den he uns unde unsen nakomelinghen dar up ghegheven heft enen anderen hoff in dem sulven dorpe to Olvenstede dar de wyntmele uppe steyd dar Hans Arndes upe wond ok myd lenware myd alleme rechte unde vryheyd unde ok myd eneme schillinghe Meydeborghescher penninghe unde eneme hove iarlikes ewyghes tynses up to nemende alle iar up sunte Walberghe dag myd sodaner rechticheyd darane had heft unde den tyns up de verscrevene tyd dar van alle iar upghenomen heft. Des to bekantnisse unde tuchnisse hebbe we Hinrik deken unde dat capittel der erbenomden kerken to sunte Nicolawese up dem nyenmarkede to Meydeborch dem erwardighen hern Hinrik abbete des erbenomden goddeshuses to Berghe unde synen nakomelinghen in der ebbedye dessen ieghenwerdighen breff witliken besegheldt vor uns unde unse nakomelinghe myd unses capittels anghelanghen grote ingheseghel de ghegheven is in der bord godes vertynhunderd iar in deme dritteynden iare darna in sunte Agaten daghe der hilghyn iuncfrowen.

*Original im Staatsarchiv zu Magdeburg s. r. Kloster-Bergische Stiftung 74. Abschrift im Privilegienbuche S. 301—303 mit der Ueberschrift: Olvenstede II curiarum concambium. in cap. G XXIII.*